

**Siunnersuut: Peqqinnissaqarfiup aqunneqarnera, aqqissuussaana kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaata allanngortinneqarneranik Inatsisartut inatsisaat nr. xx, xx. xx 2012-meersoq**

**(Napparsimasut Peqqinnissaqarfimmut Maalaarutaannik Aalajangiisartoqatigiinnut maalaaruteqartarneq)**

(Naalakkersuisut)

**Saqqummiussissut**

(Peqqissutsimut Naalakkersuisoq)

**Siullermeerneqarnera**

Naalakkersuisut sinnerlugit matumuuna Peqqinnissaqarfiup aqunneqarnera, aqqissuussaana kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaata allanngortinneqarneranik Inatsisartut inatsisissaattut siunnersuut saqqummiutissavara, (pineqarluni Napparsimasut Peqqinnissaqarfimmut Maalaarutaannik Aalajangiisartoqatigiinnut maalaaruteqartarneq).

1. januar 2011 danskit inatsisaat nr. 706, 25. juni 2010-meersoq atuutilerpoq, taamaalillunilu peqqinnissaqarfimmut naammagittaalliorsinnaaneq taarsiiffiqineqarsinnaanerlu pillugit inatsit allanngortinneqarluni.

Inatsimmik allanngortitsinerup ilaatigut kingunerai Peqqinnissaqarfiup Napparsimasut Sullinneqarneranni Maalaaruteqartarfiata – manna tikillugu napparsimasut nunatsinneersut naammagittaalliuutaannik suliaqartaraluartup – atorunnaarsinneqarnera, 1. januar 2011-miillu Napparsimasut Peqqinnissaqarfimmut Maalaarutaannik Aalajangiisartoqatigiinnik taarserneqarluni.

Inatsimmik allanngineq taanna Kalaallit Nunaannut atuuttussaatinneqanngitsoorpoq, taamaamat Peqqinnissaqarfiup Napparsimasut Sullinneqarneranni Maalaaruteqartarfiata pillugu malittarisassat nunatsinni sulit atuupput.

Tamanna tunuliaqutaralugu Napparsimasut Peqqinnissaqarfimmut Maalaarutaannik Aalajangiisartoqatigiit nalilerpaat Inatsisartut tunngavissat kalaallit inatsisaanni naammattumik ersarissuseqanngitsut, tamannalu aalajangiisartoqatigiit napparsimasut nunatsinneersut naammagittaalliuutaannik aalajangiinissamut piginnaatitaaffeqannginnerannut pissutaaqataasoq.

Taamaattumik napparsimasut nunatsinneersut naammagittaalliuutaannik sulianik ingerlatsineq maanna uninngatinneqarallarpoq, tamatumalu kinguneraa napparsimasut pisinnaataaffiik eqquutsitsisarnissap atortuutinneqarunnaarnera. Taamaattumik pissutsit taamaannerisa maanna inatsisip allanngortinneratigut iluarsineqarnissaat pingaaruteqarluinnarpoq.

Peqqinnissaqarfiup aqunneqarnera, aaqqissuussaana kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaata allanngortinneqarnissaanik siunnersuummi Kalaallit Nunaanni peqqinnissaqarfimmi peqqissaanermik suliallit sulinerat pillugu naammagittaalliuutit peqqissaanermik suliallit pillugit naammagittaalliuutinik Danmarkimi suliaqartartunut suliaassanngortitsisarnissaq pillugu Naalakkersuisut maleruagassanik erseqqinnerusunik aalajangersaasinnaapput.

Naammagittaalliuutit Danmarkimi naammagittaalliortarfimmut saqqummiunneqarsimasut qallunaat tungaanniit suliaralugit aallartinneqarsimapput. Tamanna pisimavoq Peqqissutsimut Naalakkersuisoqarfik isumaqatigalugu.

Taamaattorli Napparsimasut Peqqinnissaqarfimmut Maalaarutaannik Aalajangiisartoqatigiit nunatsinni pisunut tunngatillugu naammagittaalliuutit suli aalajangiiffigisanngilaat, inatsisitigut tunngavissat aaqqinneqarsimannginnerat innersuussutigalugu.

Taamatut oqaaseqarlunga siunnersuutip Inatsisartuni akuersaartumik oqaluuserineqarnissaanut tunniuppara.